

চক্রের সদস্য 'নীলয়' পরীক্ষার্থী

এস এম আজাদ ▷

নীলয় আহমেদ নামে ফেসবুকে ভূয়া আইডি খুলে ঘোষণা দিয়ে একের পর এইচএসসি পরীক্ষার প্রশ্ন ফাঁস করা ছেলের নাম ইকরাম হোসেন। ভূয়া আইডিতে নিজেকে বুয়েট ছাত্রলীগ নেতা দাবি করলেও ইকরাম নিজেই এবারের এইচএসসি পরীক্ষায় অংশ নিয়েছে। হৃদয় হোসেন নামে আরেক অনার্স পড়ুয়া শিক্ষার্থী আদনান আহমেদ জয় নামে ফেসবুকে ভূয়া আইডি খুলে প্রশ্ন ফাঁস করে। ওরা মূলত বিজি প্রেসের এক কর্মচারী ও এক শিক্ষকের সহায়তায় পরীক্ষার আগেই ফেসবুকে প্রশ্নপত্র ফাঁস করেছে।

পরীক্ষার দুই দিন আগে প্রশ্ন দেওয়ার কথা বলে নীলয় আহমেদ আইডি থেকে ১০ হাজার টাকা করে নেয় ইকরাম। পরে পরীক্ষার কয়েক ঘণ্টা আগে সে ফেসবুকে সেই প্রশ্নপত্র ফাঁস করে। এভাবে গত এক মাসে তারা অসুত ১০ লাখ টাকা হাতিয়ে নিয়েছে। ইকরামের একটি ব্যাংক অ্যাকাউন্টেই আছে পাঁচ লাখ ২৮ হাজার টাকা।

চলতি বছরের এইচএসসি পরীক্ষার প্রশ্নপত্র ফাঁসকারী চক্রের ৯ সদস্যকে গ্রেপ্তারের পর এমন সব চাঞ্চল্যকর তথ্য পেয়েছেন গোয়েন্দা পুলিশের (ডিবি) তদন্তকারীরা। ভূয়া আইডি থেকে প্রশ্ন ফাঁসের অভিযোগ ওঠার পর ধারাবাহিক অভিযান চালিয়ে চক্রটিকে শনাক্ত করা হয়। আটককৃতদের জিজ্ঞাসাবাদে আলমগীর ও এক শিক্ষকের নাম এসেছে, যাদের ধরার চেষ্টা চলছে। ডিবি'র সহকারী কমিশনার (এসি) মাহমুদ নাসের জনি কালের কণ্ঠকে জানান, গত ৮ জুন রাজধানীর ডেমরা ও তেজগাঁও শিল্পাঞ্চলে অভিযান চালিয়ে ৯ জনকে গ্রেপ্তার করা হয়। প্রথম দফা এক দিনের রিমান্ড শেষে গত শনিবার তাদের ফের এক দিনের রিমান্ডে নেওয়া হয়।

মাহমুদ নাসের জনি জানান, ইকরামই নীলয় আহমেদ নামে ফেসবুকে আইডি খোলে। তার বাড়ি ব্রাহ্মণবাড়িয়ার বাঞ্ছারামপুরে। সে এবার পুরান ঢাকার শহীদ সোহরাওয়ার্দী কলেজ থেকে মানবিক বিভাগের শিক্ষার্থী হিসেবে এইচএসসি পরীক্ষা দিচ্ছিল। হৃদয় নামের ছেলের আদনান আহমেদ জয়



প্রশ্ন ফাঁসের
অভিযোগে
গ্রেপ্তার ৯

নীলয় নামে ইকরাম ফেসবুকে
ছাত্রলীগ পরিচয়ে প্রশ্ন ফাঁস
করে। তার অ্যাকাউন্টে
মিলেছে পাঁচ লাখ টাকা

নামে আইডি খোলে। সে মুন্সীগঞ্জের একটি কলেজে অর্থনীতি বিভাগে অনার্স প্রথম বর্ষে পড়ে। তাদের সঙ্গে ছাত্রলীগের কোনো সম্পর্ক খুঁজে পাওয়া যায়নি। চক্রটি বিজি প্রেসের কর্মচারী আলমগীর হোসেন ও জুয়েলের সহায়তায় প্রশ্ন ফাঁস করে তা ফেসবুকে ও হোয়াটস আপসহ বিভিন্ন অনলাইন মাধ্যমে ফাঁস করে। এর মাধ্যমে তারা প্রচুর টাকা হাতিয়ে নেয়। মূলত বিকাশে টাকা নেয় তারা।

গত ১৯ এপ্রিল এইচএসসি'র জীববিজ্ঞান প্রথম পত্রের প্রশ্ন ও ২১ এপ্রিল জীববিজ্ঞান দ্বিতীয় পত্রের প্রশ্ন পরীক্ষা শুরু এক ঘণ্টা আগে 'আহমেদ নীলয়' নামে ফেসবুকে অ্যাকাউন্ট থেকে ফাঁস করা হয়।

কালের কণ্ঠ অনলাইনে এ বিষয়ে রিপোর্ট হলে চটে যায় সেই 'নীলয় আহমেদ'। তার টাইমলাইনে লেখা হয়, 'কালের কণ্ঠ আমাকে...কাল করছি না।' এরপর লেখা হয়, 'শালা সাংবাদিকদের জন্য কিছু দিতে মন চায় না। অনেক বড় বিপদে আছি, তার পরও সাহায্য না করে পারলাম না। সবাই দেয়া করে। ইনশাআল্লাহ যাতে তোমাদের পাশে থাকতে পারি। সকালবেলা সবাইকে

আগে প্রশ্নটা ফ্রি দিলাম।' একই আইডিতে ১৯ এপ্রিল প্রশ্ন ফাঁস করে লেখা হয়, 'প্রতিদিনের মতো আজকের সকালবেলা প্রশ্ন সবাইকে ফ্রি দিলাম, শুধু প্রমাণ দেওয়ার জন্য। পরীক্ষার হল থেকে এসে মিলিয়ে নিও। আর যারা আগের দিন ১০,০০০ টাকা দিতে পেরেছে তাদের এক দিন আগে এই প্রশ্নটা দিয়েছিলাম। অনেকেই বিশ্বাস করতে পারো না। তাদের কাছে প্রমাণ দেওয়ার জন্য দিলাম।'

নীলয় তার ফেসবুকে বুয়েট ছাত্রলীগের দপ্তর সম্পাদক হিসেবে নিজের পরিচয় দিয়েছে। তবে বুয়েট ছাত্রলীগ সভাপতি শুভ জ্যোতি তাঁদের সংগঠনে এই নামের কেউ নেই বলে দাবি করেন। এদিকে নীলয় আহমেদ নামে যে ফেসবুকে আইডি খোলা হয় সেখানে মেজবাবুল করিম অপু নামের এক যুবকের ছবি ব্যবহার করে ইকরাম। অপু এ ব্যাপারে ২২ এপ্রিল পল্লবী থানায় একটি সাধারণ ডায়েরি (জিডি) করেন। পুরো বিষয়টি নজরে আনার পর ফেসবুকের সহায়তায় নীলয় আহমেদ নামে আইডি ব্লক করে দেয় ডিবি। পরে আবারও একই নামে আইডি খোলে ইকরাম।

ডিবি'র কর্মকর্তারা বলছেন—শুধু জীববিজ্ঞান নয়, প্রায় সব বিষয়েরই প্রশ্নপত্র ফাঁস ও ভূয়া প্রশ্নপত্র দিয়ে প্রতারণা করছে ইকরাম, হৃদয় ও তাদের সহযোগীরা। মূলত গত বছর এইচএসসি পরীক্ষার সময় বিজি প্রেসের চক্রটির সঙ্গে পরিচিত হয় হৃদয়। এবার তার সূত্রে ইকরাম এ ব্যাপারে জানতে পারে। পরে তারা অপকর্ম শুরু করে। আলমগীর ও জুয়েল তাদের গ্রেস থেকে প্রশ্ন দেখে মোবাইল ফোনে বলে দিত। নরসিংদীর একজন শিক্ষক পরীক্ষা শুরুর এক ঘণ্টা আগে ছবি তুলে পাঠাতেন।

ডিবি'র কর্মকর্তারা বলছেন, ইকরাম ও হৃদয় অসুত ১০ লাখ টাকা হাতিয়ে নিয়েছে বলে ধারণা করা হচ্ছে। ডাচ-বাংলা ব্যাংকে ইকরামের একটি অ্যাকাউন্ট পাওয়া গেছে। সেখানে পাঁচ লাখ ২৮ হাজার টাকা রয়েছে।

গতকাল দ্বিতীয় দফা এক দিনের রিমান্ডে নিয়ে ইকরাম, হৃদয়, সাইফুল ইসলাম ওরফে জুয়েল এবং তাদের সহযোগী রুবেল ব্যাপারী, আবদুস সাত্তার, মেজবাব আহমেদ, কাওছার হোসেন, আল আমীন ও জাহাঙ্গীরকে জিজ্ঞাসাবাদ করে ডিবি।